

# Vun driweriwer

erscheint auf [www.lenauheim.de](http://www.lenauheim.de)

monatliche  
Erscheinung

Juli 2011

von Helen Alba

## „Wander- un Standveegl han mitnaner gezwitschert“ Banater Heimattäch 2011 han de Temeschwarer de Atem ghol

Es war e Fescht wie im Bilderbuch. Die Heimattäch der Banater Deutsche sin zum zehnte Mol in Temeschwar abghal gin. In dere Stadt hats drei Täch lang nor so vun Schwowe gewuwelt. Aus Deitschland sin se kumm un han sogar die Blechmusich „Original Banater Dorfmusikante“ mitgebrung. Jugendtrachtegruppe aus Esslingen, München un Singen ware do un han mit unsre Jugendliche aus Heed un Heck, Banater Bergland, awer ach mit eener Jugendgruppe aus Ungarn getanzt un sich unerhal.

Die zehnti Auflage der Heimattäch hat sich natierlich vun alli anre Auflagen unerscheide misse. Un so han sich die Veranstalter was ganz Aussergewöhnliches ausgedenkt. De 17. Juni war ach de Radiotach: 10 Jahr FunkForum un 55 Jahr deitschi Sendung bei Radio Temeschwar. Die deitschi Sendung an sellem Tach is direkt ausm AMG-Haus iwertraa gin. Am Begauer, gegeniwer vun dere „Flora“-Terrasse, war e Biehne ufgebaut. Owets punkt siewe Uhr war wieder e Direktsendung, anfang hat de Vetter Franz Hoffner mit seiner „Big Band“. Dernoh han Kiner un Erwachseni, alli in Tracht natierlich, getanzt. Weil die Biehne derfor zu kleen war, hats alli nix ausgemacht, newedran ihre Tanzkunscht zu zeiche. Un e Stund vor Mitternacht han die Dorfmusikante aus München uf dere Biehne ufgspilt. Die meischte Zuschauer ware awer am „Flora“-Ufer, han sich die Vorstellung iwer die Bega anschaut, während ufm Wasser die Tschinakle langscht gfahr sin. Es war e Bild, e Owet, de mer schwer beschreibe kann: wunerscheen!

Im Opersaal sin die Heimattäch e Tach dernoh feierlich ereffnet gin. Gäscht un Perseenlichkeite han Rede gschwung. De greeschte Applaus hat awer unser Vetter Ignaz Bernhard Fischer kriet, wie er die Banater Schwowe, die was heit in Deitschland lewe, awer immer wieder geere hem kumme, als Wanderveegl genennt hat. Un mir, die wu mer dogeblieb sin, als Standveegel. Un bei de Heimattäch tun „Wander- un Standveegl mitnaner zwitschre“. Am gleiche Nohmittach war de „Capitol“-Saal gstuppte voll. Alli sin uf ihre Koschte kumm. Es Kulturprogramm hat die Leit vun de Stiehl geriss, de Applaus hat nit ufheere wille. Alli ware dernoh schun bissl mied. Doch wie es Baal im AMG-Haus anfang hat, do war die Miedichkeit wie wechgeblöst.

Un am Sunntach, wie 215 Trachtenphaare dorchs Temeschwarer Zentrum maschirt sin, ja, do ware sich alli eenich: „Schad dass solchi Täch nor jedes zweiti Jahr in Temeschwar abghal gin!“